

Date – 24/07/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

AKASHVANI AIZAWL

1. Chief Minister Pu Lalduhoman sorkar laipuiin FCRA Amendment kalpui a tum danah chungchangah naktuk ah kohhran hrang hrang hruaitute meeting an neihpui dawn a ti.
2. Prevention of Corruption Act Special Court chuan Mizo Carbon Product subsidy eiruk thubuaia thiamloh chantir mi 4 te chu kum 2 chhung lungin tang turin a hrem.
3. Union Minister J P Nadda leh Dr.Jitendra Singh te chuan vawiin khan CJP aiawhte New Delhi-ah an bia.
4. Union Minister Kiren Rijiju chuan examnaa dankalha thilti thinte hremna tur dan chak tak siamna kawngah engmah tihkhawtlai awmlova hmala turin Prime Minister Narendra Modia theihtawp a chhuah a ti.

<><><>

CM

Chief Minister Pu Lalduhoman sorkar laipuiin FCRA Amendment kalpui a tum danah pawm theih loh a awm avangin naktukah Council of Churches in Mizoram leh Mizoram Kohhran Hruaitute Committee hruaitute meeting an neihpui dawn a ti a, he amendment an kalpuina tura an duh dante central sorkarah an thlen dawn a ii.

Vawiin khan Kawrthah North Village Council in Deen Dayal Upadhyay Panchayat Satat Vikas, 2025 hnuiaia "Clean & Green Panchayat," lawmman pakhatna an dawn lawmna an khuaah an buatsaih a hmanpuinaah he thu hi sawiin Chief Minister chuan NEET Exam zawhna putru avangin India ram pumah thalaiten lungawilohna an lantir chu an thlawp a ti.

Chief Minister chuan, sorkar hmathlir chu kum 2047-a India ram GDP-a zaa pakhat lo thawhchhuah ve theih a ni a ti a. Chu hmathlir tihlawhtling tura tihtur hmasa chu khaw tinte Sustainable Development Goals tihpuitlin a ni a ti bawk. NITI Aayog-in tun hnaia Second Edition of District Sustainable Development Goals Index Report a tihchhuahah India hmarchhak bialah Hnahthial district chu pakhatna a ni tih sawiin Champhai district chu pahnihna a ni a, Kolasib district chu pakuana a ni a. District dang zawng zawngte pawh a tittha pawl an ni vek a ti.

Kawrthah North mipuite chuan Sustainable Development Goals tihhlawhtlinna kawngah thil tam tak an ti ve thei a. Infrastructure lian pui pui nena bultan kher lovin, mipui tangrualten hna ropui tak an thawk thei a ni, tih an tilang a ni, a ti a ni.

Kan corr report ngaithla ang.

LAD Director Dr. Lalingura Tlau in a he huna a tarlan danin, Ministry of Panchayati Raj hian mumal takin Panchayati Advancement Index (PAI) hmangin India rama VC tinte inelna a kalpui a. PAI data lut atangin khaw tinte an endik ta a, Kawrthah North VC te hian data dik tak, a hmuna endik tlak ngei zel an lo thehluh avangin he lawmman hi an dawng ta a ni.

Kawrthah North-ah hian in tinin LED Bulb an chhi vek a, an VC hian ngaw nei tha hle mahse phun belh zel tur Thing tiak kuina Green House an nei a, kumtin an phun belh a. In tinin LPG Connection an hmang a, Plastic bawlhhlawh zawng zawng VC ten an lei a, an khaw chhung a fai em em reng bawk a ni ni a sawi a ni.

(DIPR)

<><><>

MZP

Mizo Zirlai Pawl MZP chuan Mizoram Teacher Eligibility Test (MTET) buatsaih turah application hnawl tam lutuk chu ennawn turin Mizoram Board of School Education an ngen.

MBSE hian thla thar ni 7 ah MTET Exam buatsaih a tum a, form fill-up 5000 chuang zinga application 884 reject an ni a, hemi chungahcngah hian MZP hruaitute chuan MBSE Chairman Pu JH Zoremthanga vawiin khan an hmu a, MBSE hotute chuan, MTET exam turah hian kum dang zawng aia applicants an tam thu an sawi a, reject tam takte chu form an fill-up laia document thehluh kim loh avangte, B.A Certificate/ Marksheet turah HSSLC Certificate/ Marksheet an thil tel avang leh HSSLC a zaa 45 hmuh ngai zat hmu phalo tam takin form an fillup thu MZP hruaitute an lo hrilh a ni.

MZP hruaitute chuan, MSBE in a MTET exam kum 1 chhunga vawikhat chiah a buatsaih thin avangin, reject list tar chhuah hnuah pawh siamthat lehna hun siam dan tur ngaihtuah sak turin MBSE Chairman chu an ngen a, hei bakah hian kum 1 chhunga exam vawi 2 tal buatsaih thin turin an ngen bawk a. MBSE Online Portal pawh tih changtlun a nih theihna turin rawtna hrang hrang an thlen bawk a ni.

(Hruaia Aizawl pTC)

<><><>

MIZO CARBON

Prevention of Corruption Act Special Court-a Special Judge F. Rohlupuian Mizo Carbon Product subsidy eiruk thubuaia thiamloh a chantir mi 4 te chu kum 2 chhung lungin tang tur leh cheng nuai 1 theuh chawi turin a hrem.

Special Judge F. Rohlupua chuan heng mi pali, Ravi Gulgulia, Vimal Kishore, Pramod Bharech leh Sandeep Agarwal, Guwahati Assam ami te chu IPC Section 120B hnuaia 420 - na hnuaiah thiam loh an chang tih nimin khan a puang a, vawiin khan an hremna hi tihchhuah leh nghal a ni.

He thubuai hi kum 2017 atanga ngaihtuah tawh a ni a. Luangmual Industrial Growth Centre-a Mizo Carbon Product Ltd ten sawrkar laipuiin hmarchhak biala thil siamchhuahna tih hmasawmna atana a ruahman, Central Transport Subsidy (CTS) leh Central Capital Investment Subsidy (CCIS) a pek te chu dik lo takin an dil ni a sawi a ni a. CTS leh CCIS hnuaiah hian cheng vaibelchhe 3 leh nuai 41 vel an la tawh ni a sawi a ni. CTS leh CCIS hnuaia subsidy dawng tur hian coke siam chhuahna tura hmanrua te, a phurh kualna leh lehkha dangte chu lehkha lem hmanga lak vek ni a sawi a ni.

He thil a in hnamhnawiha puh mi 13 dang, Dr. Margareth M. Varte, Biswajit Chanda, Kajal Kanti Dey, J. Lungawia, Suchil Kumar Goyal, Atul Goyal, Praveen Choudhury, Santosh Kumar Jain, Lalrohlui, Rozama, LV Vanlalrema, John Saikhuma leh Navin Jain te chu an thiamlohna tur finfiahna a awm that tawh loh avangin thiam chantir an ni.

Corr – Rodi

<><><>

MIGAHTA:

Mizoram Govt. Adhoc - Aided High School Teachers’ Association (MIGAHTA) chuan sorkara an lungawilohna lantir nan vawiin a ni 4-na atan No Teaching Day hman chhunzawm a ni.
Kan corr report ngaithla ang.

The Mizoram Education (Lumpsum Grants-in-Aid for General Maintenance of Private School) Rules, 2026 sorkarin a tihchhuah duhloh kal zelah Mizoram puma Adhoc – Aided High School 90 chuangah lungawilohna hi a ni 4 na vawiin thleng khan lantir chhunzawm a ni a. MIGAHTA chuan Mizoram sorkar a an thil phut te tih hlawhtlin a nih theih nan kar leh ni 27 leh ni 28 hian Mass Casual Leave lak an tum thu an sawi.

MIGAHTA chuan sorkara an thil phut hrang hrangte a hlawhtlin theihna tura an hmalaknaah hun engemawti chhung chu zirna a khaihlak a nih pawhin a tuar tu zirlaite, nu leh pa leh khawtlang hriatthiamna an ngen a ni.

Corr – Rodi

<><><>

BLOOD DONATION

Aizawl Electric Veng Branch YMA chuan Electric Veng YMA Hall-ah an Member Tv. C. Lalremruata, Mizorama Unit tlinga thisen vawi 100 pe hmasa ber pualin Thisen pek runpui an buatsaih a, a mamah apiang hman turin thisen unit 100 an pe a ni.

Health and Family Welfare Minister Pi Lalrinpuii chuan he hun hi hmanpuiin, Tv. C. Lalremruata’n a vawi 100-nana unit tlinga thisen a pe chu a ropui

a tih thu sawiin, midangte tanpui nan leh nun chhan nân thisen unit 100 a pe thei chu zahna chibai a buk a, lawmpuina thuziak leh pawisa fai a hlan a ni.

Health and Family Welfare Minister chuan thisen pek chu a pawimawh thu sawiin, mahni mihring puite nun chhanhim nan thisen pek uar deuh deuh a ngai a ni a ti a. Mizoram chu India ramah pawh thisen pe tha pawl kan nih thu sawiin, thisen pek chu mimal leh pawl anga uar zel a ngai a ni a ti a, kalkhawmte chu nunna hlu tak chhan tura thisen pe uar turin a sawm a ni.

He hun hi Electric Veng YMA President, Pu C. Lalnunfela chuan a kaihruaia. Electric Veng YMA Member 100, mipa 94 leh hmeichhia 6 in thisen an pe a ni.

(CORR-Rodi)

<><><>

ADSC VB SPORTS

Aizawl District Sports Committee (ADSC) buatsaih 'Viksit Bharat Aizawl District Sports Festival 2026' chu tluang takin neih mek a ni a; Viksit Bharat Aizawl District Sports Festival-ah hian infiamna chi hrang 16 hmangin Aizawl khawpui hmun hrang hrangah intihsiakna neih a ni.

Kan corr report ngaithla ang.

Viksit Bharat Aizawl District Sports Festival-ah hian vawiin khan Under-17 Boys' & Girls volleyball semi final inelna neih leh a ni a, Judo championship khelh zawh a ni bawk.

Judo championship, khelh zawh takah hian Team 8 an tel a, -Sports Authority of India (SAI) Mission Vengthlang, Khelo India State Center of Excellence (KISCE) Mualpui, Salem Veng, Zemabawk Judo club, GSDP Tuirial Judo club, Muallungthu Judo club (EMS) , MSSC NRC ,Thutak nunpuitu Team (TNT) leh Zemabawk North Judo club te an ni.

Players tel zat hi an vaiin mi 76 niin ,Mipa-43 leh Hmeichhia-33 an tel a, Weight category 20 siam a ni .

Sports Authority of India (SAI) hian Gold 12 ,Silver 9 leh Bronze 2 an la a, Thutak nunpuitu team (TNT) hian Gold 4, Silver 2 leh Bronze 8 an la a, KheloIndia State Centre of Excellence (KISCE) hian Gold 2 , Silver 3 leh Bronze 3 an la a, MSSC NRC hian Gold 2, Silver 2 leh Bronze 2 an la a, Zemabawk North-in Gold 1 leh Bronze 1 ,Zemabawk Judo club-in Gold 1 leh Silver 1 la in, Muallungthu Judo Club hian Bronze 1 an la a ni. Vawiin vek khan Taekwondo event khelh zawh a ni bawk.

Viksit Bharat Aizawl District Sports Festival hi tun thla ni 30 thleng neih a ni dawn a, infiammi 1000 vel telin, chess, weightlifting, teakwondo, football, wrestling, judo, wushu, rifle shooting, table tennis, hockey, karate, athletics, volleyball, badminton, boxing leh tennis hmangtein inelna buatsaih a ni.

(Hruaia Aizawl PTC)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

CJP AND GOV.

Union Minister J P Nadda leh Dr.Jitendra Singh te chuan vawiin khan CJP aiawhte New Delhi-ah an bia a. Pu Nadda chuan an inbiaknaah hian CJP ten phut an neihte dawhthei takin an ngaithla a ti a. Pu Nadda chuan thil phut lian bik pathum leh exam zawhna putru thin venna tura an rawtna te an ngaithla a ti a. Naktukah sawrkar chuan inbiakna a neihpui leh dawn tih a sawi bawk a ni.

Hetihlai hian CJP thupuangtu Ahsutosh Ranka chuan sawrkarin an thil phut pathum zinga pahnih chu a pawmsak tawh niin a sawi.

(Newsonair)

<><><>

KIREN RIJJU

Union Minister Kiren Rijju chuan examnaa dankalha thilti thinte hremna tur dan chak tak siamna kawngah engmah tikhawtlai awmlova hmala turin Prime Minister Narendra Modia theihtawp a chhuah a ti. Vawiina Parliament tuala chanchinbumite a kawmnaah Pu Rijju chuan Pu Modia duhdan hi ram pum huap pawha mitin duh a ni a ti a. Sarwkarin zirlaite hmalam hun venghim turin hmalakna pawimawh tak tak a nei a ti a. Oppostion te beiin Parliament ah thil sawiho thei loin an tibuai tih sawiin thalaite thinrim an la hmachhawn ngei ang a ti bawk.

(Newsonair)

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 136-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a,

AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

(Newsonair)

